



Bartholomæus apud Lutzelburgenses in Belgia natus anno circiter 1485. Is cum felici ingenio esset præditus, post prima literarum fundamenta iacta, ad exterarum academiarum peruenit, & sua industria magnum sibi nomē comparauit. In primis uerò in Italia Philosophiæ & Oratoriæ incubuit, & talis euasit, ut Erasmo familiaris inter uiros doctissimos recenseretur. Inde sese Lutetiam Parisiorum contulit, & breui ob eruditionem omnibus innotuit. Itaque factum ut ibidem professor Regius constitutus fuerit. In eo loco Ciceronem publicè legit, atque eius orationes, Partitiones oratorias, Topica, et Officia cōmentarijs illustrauit, anno circiter 1535.

Hanc eius eruditionem cum Treuerensis elector cognouisset, Bartholomæum ad se uocauit, atque in suum senatum cooptauit. Ibi uerò diligenter sacras literas legit, & earum usum adeò sibi familiarem reddidit, ut in Theologia libros ederet, atque sese Euangelicis, & in primis Martino Bucero opponeret. Postea quoque cum 1546 Ratisbonæ colloquium inter Catholicos & Euangelicos Cesaris iussu institueretur, hic Lathomus cum suæ partis Theologis interfuit, & doctrinam pontificiam multis argumentis confirmauit. Itaque ipse ob hæc ingenij monumenta magnum sibi nomen comparauit. Is Confluentiæ ad Rhenum iam octuagenarius etiamnum superest, & subinde aliquid meditatur, quò suas lucubrationes ad posteros transmittere queat.